

## Багъ наста саальч

Сарпинск района, „Гигант“ колхозин 4-ч комплексн бригадт онъгрси джил тӧрскн газр-тан ирсн Убушиева Валя кӧдл-джәнә. Түрүн болдж олн-зүсн даалгъвр кўцәджәв.

Малин 4-ч ферм бӯрдәгдхлә Убушиеваг тугълчин кӧдлмшт батлв. Эн кӧдлмшән ик байр-тагъар авч, шунмгъа кевәр кўцән бәәдж, саальч кӧдл-джәсн әмтнәс саалин кӧдлм-шин эв-аргъ дасв. Тиигәд кӧд-ләд бәәтлнъ, саалин ўкрмӯд Валяд ӧгв.

„Чаднув, угай?“ гидж Валя

түрүн даругъан әәмсджәлә.

Бичкә әәгъәд бә, кўнд болад бәәхлә, донъгән кўргхв бидн, — гидж бригадир ўр Стульнев болн ўурин кўўкднъ Катанева Галя, Брагунцева Валя селв-гән ӧгч келцхәв.

Хойр сар эн кӧдлмштән кӧд-лснә хӧн, сән саальч болв гидж келдж болмар Валя дам-шлт авб. Ўкрмӯд саалгъарн Валя ўурин кўўкдәсн ўлдж йовхмн уга. Эврәннъ кӧдлмш-тән дурга, эвинъ меднә, медр-лән данъгин ӧӧдлүләд йовна.

И. САРПИНСКИЙ.